

四庫全書

集部

欽定四庫全書

清江詩集卷七

明 貝瓊 撰

七言律詩

送襲封衍聖公孔希學還闕里

在京作

星斗光芒萬丈騰，賜書連舸出金陵。
雁違青塚天將雪，馬度黃河夜已冰。
博士經存終漢出，上公爵重自唐升。
喜聞手植庭中檜，翠接東蒙幾百層。

送愚上人歸越中并簡奎方舟長老

在京作

天界歸來亦已遲
庭松此日定回枝
山中結社無靈運
海上留衣有退之
鶴去雲霄隨錫杖
龍收風雨入軍持
西湖若見方舟老
為說三生夢裏詩

觀海與鮑仲孚同賦

弱水之外有蓬萊
雲中髣髴金銀臺
終驅汎濫羣流合
始與鴻濛一氣開
石壁三更看日上
星槎八月到天回
麻姑何處窺清淺
近日無書寄鶴來

送王克讓員外赴陝西

貂裘萬里獨衝寒，舊是含香漢署官。
白雪作花人面落，青山如鳳馬頭看。
關中相國資王猛，海內蒼生望謝安。
應念東南有遺佚，采芝深谷尚盤桓。

送戶部尚書貢泰甫開司閩中榷鹽易米給京師二首

昨日除書下五門，地兼中外亦殊恩。
三山迥出南荒小，八座元同北斗尊。
悟主已知如內相，封侯終見自公孫。
荆揚樂土今凋瘵，他日從容為一言。

兩隅未靜出師頻聖主經營仗老臣
天河轉粟遙通薊臘月看花近到閩
道上豺狼應避馬山中猿鳥不驚人
公餘定有詩千首好託邊鴻寄早春

題徐太章白鶴山居

孤煙一曲紫雲邨好客尋常遠到門
水落已知魚可笱夜深不畏虎夔隣
人送酒酌花下稚子讀書當樹根
白鶴千年時過此山中還有令威孫

三月晦日

王師未下姑蘇臺客子野次獨徘徊城南酒徒不復見
院裏桃花空亂開兒女新年俱已長弟兄何日却同回
故人千里寄書至相約山中拂紫苔

寄內弟陸熙之

我別禦兒溪上宅月當二十四迴新如何故國尚戎馬
即恐比隣非昔人簫鼓誰家猶作社樓臺廢苑不成春
夜寒憶爾無由見悵望黃姑析木津

寄潘時雍

潘岳閒居學灌園一椽茅屋近青門野鳥得食頻將子
慈竹團陰定長孫賓客過門車蓋合兒童汲井轆轤喧
春風金谷空流水且共高歌醉瓦盆

送翁鎮方歸天台

雲氣空濛是赤城高歌歸去不勝情天傾滄海東南迤
地接丹邱日夜明念我好將黃獨寄知君先向石橋行
春風一路啼鶯巧定有花間窈窕迎

題雲溪耕隱

屋外青山青似蓮雲溪隱者即神仙桑麻社曲非無地
雞犬桃源別有天載酒鄰翁時叩戶賣魚溪女不論錢
卧龍何事煩三顧祇合隆中老歲年

題丁成之清樾軒

九龍山前處士宅草堂低小盡青苔樹陰滿地日不到
水氣著人秋已回無數黃鸝相對語有時翠碧忽飛來
移床與客竹間坐千里好風真快哉

鄭憲卿省郎織毯松江還詩以送之

鶴城翠織出天機卷付星查使者歸瑞草奇花春欲動
彩鸞青鶴晝交飛峒人不用誇山蜀朝士何須惜地衣
聞說千秋佳節近吳宮高會更光輝

雲間見李克敏將歸吳陵作詩為別

與子西東二十霜尚思年少醉錢唐人間日月如行客
馬首山川忽異方歷歷早鶯初變語翩翩歸雁未成行
明朝陌上重分袂更盡吳姬酒一觴

賦小瀛洲二首

海上瀛洲碧水新地連方丈絕風塵九光霞館邀王母
一曲鸞笙降玉晨若木迴枝長挂日桃花結子不知春
祖龍謾自求方士却恐流傳語未真

仙人長住白銀宮不似淮王禮八公日月自周三島外
山川盡縮一壺中赤麟紫鳳池臺勝姹女河車服食同
清夜步虛相和處琪花如雪又春風

題苧溪漁友宅

徵君白苧溪頭住細雨斜風一短蓑山木兩邊啼杜宇

浪花千頃落鴛鴦故人且復辭光武使者何須認志和我亦買田來結屋沙棠船小日相過

十月聞雷

天氣初寒春尚賒坎中夜半有鳴蛙百年宇宙喧戎馬十月雷霆起蟄蛇老柳黃垂霜後樹小桃紅破雨中花三公變理非無術愁聽空江度鬼車

靈鷲觀燈

天樂風傳應壑雷鷲峰春色似蓬萊一天象緯迎秋轉

千月龍宮徹夜開
西國胡僧依樹坐
上方玉女散花來
夜深借榻山房宿
更欲題詩到上臺

謝賈齊臣惠碧盃

萬里堅昆來碧盃
青蓮十葉類天成
于闐蒼玉本同色
韶州白瓷空得名
馬湏可能羞北饌
駝蹄且復薦南烹
茅齋此日足家具
一詩為報故人情

題靜天鏡碧水春軒

綠波如水不成潮
一曲潛通海眼遙
祇樹園深青鳥下

桃花浪暖白魚跳
踈星夜列開天鏡
細雨朝飛落虹橋
杜老賦詩須重過
遠公結社肯相邀

送興福寺長老鎮靜菴

西山樓閣涌波濤
西國高僧見白毫
貝葉有文留藏室
天花無跡上方袍
毒龍在鉢秋雲濕
馴虎當門夜月高
聽法他年陪相國
定因元亮置松醪

六月三日泛舟

六月三日好天氣
清江轉柁雨晴初
樹頭雲斂出紅日

石脚水生跳白魚何處老翁還獨釣可憐遊子未安居
野王堆前三女竇得意唱歌隨所如

七夕

滄江雨歇暑漸微銀床一葉迎秋飛牽牛相對織女出
明月不照征夫歸寸心耿耿只自苦雙鬢蕭蕭今更稀
仰候神光向中夜秋螢暗度鴛鴦機

十一月廿三日夜集次韻盧廷舉

河橋春向柳條歸買酒從教更典衣倒海北風三日盛

著人南雪六花飛
銅盤燒蠟詩初就
羯鼓催觴令不違
身後空名亦何用
獨憐張翰早知幾

翦韭軒

三韭行廚亦浪誇
旁人猶笑庾郎奢
春宵翠截山中葉
臘月黃分雪後芽
野飯猶能留上客
侯鯖豈復到貧家
盤中一筍青絲細
絕勝蕪菁散作花

題王士亨看山處

看山何處候神仙
地近城南尺五天
林屋雪消攢玉筍

上方雲斷出青蓮
行人獨去西風裏
倦鳥雙迴落照邊
此日騎曹誰記馬
閒支手板思悠然

元夕次韻鐵崖楊先生

元戎出號初鳴鐸
狂客忘歸更賦詩
貔虎千屯防要地
魚龍百戲夢清時
月臨粉堞南樓靜
天接滄江北斗垂
可得夜遊重秉燭
佳人雙唱玉交枝

二月十六日雨中遣興

城頭落日啼乳鴉
城中烟火冷千家
斷雲漠漠夜還合

急雨紛紛風更斜
世亂不歸空灑淚
春深何處獨看花
白龍堆前水二尺
明日泛舟攜紫霞

清明日陪楊鐵崖飲城東門是日風雨

盪舟撸鼓出東門
怪雨盲風野色昏
海上一春猶作客
樓頭三日共開樽
青山石馬新人塚
錦樹黃鸝舊相園
快意百年須痛飲
轉頭何處不銷魂

送凌彥冲歸杭

正好聽君蘇武慢
傾壺共坐白鷗沙
十年戎馬猶塞路

三月歸舟催到家江燕與人同是客
野桃成子亂飛花
使回多寄平安字要看張顛醉墨斜

寄林叔大

湖州別駕三年別文采風流想見之
水晶宮裏無傳箭
浮玉山前多賦詩
海燕空歸尋舊宅
吳蠶未老費新絲
金閨學士臨池處還與何人話昔時

槐陰亭

雲團車蓋起童童
文正三朝相業隆
種樹百年蟠厚地

讀書六月坐清風
蟬吟露葉初回夢
蟲吐秋絲忽墮空
今日洛陽卿相宅
牡丹誰看狀元紅

即事

少海旌旗落照中
沙陀兵馬雁門雄
朝宗久廢諸侯禮
翊戴方尊節度功
今日豈宜求騎劫
當年應失倚全忠
丹書鐵券存終始
萬古山河帶礪同

經故內

山中玉斂盡蒼苔
天子蒙塵豈復迴
地脉不從滄海斷

潮聲猶上浙江來百年禁樹知誰惜三月宮花尚自開
此日登臨解題賦白頭庾信不勝哀

立夏日

江寒雨急仍北風扣戶喜聞南巷翁錦城鮓送蒲茅白
玉盃酒濕桃花紅三月忽驚春似客百年那復老還童
一雙黃鸝寂無語飛過小橋高樓東

題雲深處

朝看雲出暮雲歸翁住雲深已息機海上仙人教種藥

山中玉女未收衣
須知倏忽神龍變
已作網緼野馬飛
我亦無心共來往
五城宮闕夢魂稀

題夏士文園亭

窗戶青紅竹裏開
竹深無地著塵埃
山移閬苑千峰出
水接銀河一道迴
釀酒每留賓客醉
賦詩重許老夫來
暖風遲日春如海
隨意何妨坐綠苔

重午

北里共持菖歎酒
南翁未解木棉裘
白波青嶂三吳地

怪雨盲風五月秋揮淚幾時朝鳳闕招魂何處覓龍舟
海榴一點紅如火時序催人共白頭

瑞蓮二首

雙花相向復相輝白帝西遊擁一妃羽蓋風清朝竝載
珠宮月冷夜同歸翠房已作鴛鴦結紅粉那成蛺蝶飛
亭上酒醒香不斷滿汀暮雨濕仙衣

秋水嘉蓮瑞一門初花驚見出同根弄珠漢女無留跡
鼓瑟湘靈有返魂相府昔年曾製曲仙家今日重開樽

合歡何限風流意，怨綠愁紅謾自繁。

題淵明像

素琴無絃不復鼓，清樽有酒還相持。
老奴遷鼎亦苦早，先生拂衣應已遲。
子房結客報秦日，武侯出師匡漢時。
古人今人本同調，坐對南山惟賦詩。

題松鶴山居圖

仙客盧敖東海頭，好山百轉接丹邱。
開田種玉一千頃，閉戶讀書三十秋。
雲氣上天如白鶴，茯苓入地化青牛。

年來浪跡吳淞道夢裏猿聲憶舊遊

寄奎方舟俊用章二上人

奎公不種遠公蓮卓錫西湖已十年
路入雪山靈草合泉通滄海毒龍眠
聽法每期雙樹下題詩須到四花前
干戈滿地傷飄泊目斷千峰紫翠煙

白蓮

太液初花宿露團香濃粉淡不勝寒
金莖側瀉仙人掌玉葉危擎帝子冠
水濶天空愁欲墮風清月落好誰看

西湖腸斷西施采一曲菱歌唱未闌

中秋

中秋甲子無風雨吹笛星橋意最關
七寶已修天上月三神不隔海中山
故人此夜知何處狂客經年且未還
小隊羽衣新按曲廣寒宮闕夢魂閒

錢塘秋夕

殘蠟無光小院幽梧桐一樹更蕭颼
西陵風雨來清夜南國山河入素秋
雞唱四隣呼客夢雁回千里帶邊愁

可憐季子貂裘敝遲暮何為賦遠遊

奉寄崔伯恭左丞

武林城下捷書回郡縣遙知次第開
一柱危擎南極正三江遠阻北人來
謳歌復見唐虞德匡濟深期管葛才
東閣幾時陪笑語雲間夜夜仰中台

無題二首

樓臺十二近藍橋簾幙重遮半面嬌
洛浦有神通子建天壇無意會文簫
仙衣雪皎裁蟬翼寶髻雲鬆插鳳翹

月落江寒春夢斷相思空寄海門潮

錦瑟驚笙恨總牽尚思華屋對嬋娟春風豆蔻初含日
玉女蘭香未嫁年綃拆鴛鴦裁寶扇酒行琥珀瀉銀船
蓬萊一別三清淺憔悴應知不及前

夜坐

夜寒蟋蟀語秋根獨客無眠憶故園天作穹廬籠四野
月飛明鏡照千門胡笳相應時時發戎馬初生處處屯
秉燭封書寄兄弟一身猶滯海西邨

立春日燕西清高士滄洲一曲歌者李氏善胡
琴者阮仲明引觴奏伎賓主盡歡即席賦詩
百花堂深香霧生將軍燕客更多情春光已到簷簷谷
客夢如在芙蓉城蛾眉八字遠山碧鳳尾雙絲流水清
金樽美酒敵秋露今日為君懷抱傾

別呂德常

黃鶴仙人道德尊少年曾記及龍門玉山照座聯兄弟
白髮升堂識子孫衰謝已知英氣盡激昂猶喜賞音存

不堪杜宇催歸客明日扁舟出海邨

姑蘇

城潰姑蘇伯業終蕭蕭茂苑自秋風青絲白馬來江表
紫蓋黃旗入洛中宮殿獨留殘月照綺羅應逐曉雲空
如何十萬貔貅士不及吳陵一旅雄

陸景周宅槁梧復榮以瑞梧命之為賦

石上孤生百尺標鳳皇枝老尚蕭蕭半身秋委龍蛇蛻
一氣春回霹靂焦影薄未能遮月色聲和猶待按雲韶

山童日夜勤封植莫使青青露葉凋

錢唐春日

三月皇州望欲迷湧金門外草初齊滿山雲氣不見日
一雨天街都作泥溫室樹高鸚鵡去玉津花落杜鵑啼
斷橋何日重攜酒醉和兒童唱大堤

遣興

我住雲間今四秋恰如杜甫在秦州賦詩黃耳塚前去
打鼓白龍潭上游暮景飛騰如過翼此身浩蕩一虛舟

黃塵九陌繞車蓋且伴老翁隨海鷗

二月五日燕夏士文漪瀾堂與者魯道原馬文
璧馮困如歌者張寶童不至故及之

漪瀾堂上又東風報答春光酒未空海鳥一雙鵬尾白
山花千朶鶴頭紅水邊列坐皆詞客天上清歌少玉童
不省日斜誰倒載從教拍手笑山公

浙江亭觀潮

山摧岸圻畫冥冥動地西風帶蜃腥滄海倒流吞日月

青天中裂走雷霆欲招白馬今無跡莫信神魚尚有靈
一氣虛空自升降乾坤與我亦浮萍

嘉禾道中

秀州城下雪漫漫一客東歸更覺難雁度空江寒月黑
馬嘶長路曉風酸吳趨欲賦知誰和漢節心回不復看
俯仰乾坤正蕭瑟雲間身寄一枝安

五月十一日過璜溪訪馬文璧時同門呂德厚
具酒相邀衝雨夜歸明日文璧有詩見寄用

韻答之

因君懷抱未能開
白鶴磯頭一棹來
江黑坐看飛雨至
酒酣催趁落潮回
故人有約須重過
野老無機不用猜
明日山瓶猶未竭
當筵更擲左慈杯

支子

南風院落掃繁英
薜蘿無人也自榮
五月六花開白雪
何年三粒種青城
已將色染天衣重
那惜香分水殿清
蝴蝶夢回聞更好
酒醒夜半月微明

綠陰軒夏日書懷

錦水西頭處士家，深林無徑綠陰遮。
窗前翠合書帶草，堦下紅開旌節花。
本藉居亭蘇老病，屢從宴賞悅清華。
一雙海鳥無機事，日日飛來傍釣槎。

客居

移家處士橋西畔，六月蒲蓮暗野塘。
乳鴨成花能黑白，風蟬隔葉自宮商。
買田不待沾微祿，垂釣須教具小航。
自比成都浣花叟，旁人應是笑清狂。

風涇定光寺周回三里皆荷花彷彿有錢塘西

湖之勝與筠谷高士同賦

附考風涇
婁縣鄉名

南風隔浦聞花氣
菡萏紅開十里花
宮女三更環白帝
洞庭千頃落明霞
鑿池不待煩靈運
載酒渾疑過若耶
何日與君追勝賞
滿船明月唱吳娃

題劉商觀奕圖二首

日落青山未了棋
兩翁渾似海僧癡
不辭虎口方爭險
曾取龍牙會出奇
春在洞天應不老
路經石室到今疑

老樵若悟歸來早物外神仙豈復知

爛柯山頭生白雲爛柯人去世空聞楸枰有路縱橫引
石子如星黑白分寂寂中流方對壘迢迢出塞未成軍
當時一著安劉氏四老應宜策上勲

初冬口號

朝來吉語解離憂四海銷兵戰伐休地闢堯封皆內屬
江通禹鑿已安流復見老生談俎豆遂聞壯士脫兜鍪
種瓜好覓青門地我亦為園學故侯

答宇文仲美

五兩夜逐秋鴻徂十年辟兵無定居君今不奏子虛賦
我亦終返班生廬蹲鴟如斗足野飯江魚斫玉分王餘
更種南山豆一頃試看兒子帶經鋤

冬日漫興

天陰十日猶未解臘月荆揚氣候偏雨合樹聲來夜半
風催花信立春前酒徒已老今何處狂客不歸殊可憐
山茶一株欲爛熳百壺留我醉新年

乙酉立春

今朝獨酌黃柑酒海曲逢春且自寬
老愛陶潛家栗里貧如杜甫客雲安
身輕不佩將軍印髮短猶勝隱士冠
試筆更題新帖子風光無處不宜看

正月二日偕邵貧谷過呂德常宅留飲

東風十日消殘雪溪上水深三尺高
同舟為覓故人去閉閣不放老兵逃
銀甲彈箏促雁柱玉盤縷肉鳴鸞刀
夜深更盡百杯酒莫惜淋漓宮錦袍

聞夏士文南歸喜而有作特先寄之

傳聞正月樓船發靈鵲先人到竹扉
突厥殘兵河外徙慕容諸客海邊歸
山花雨過紅于酒江草春深綠染衣
從此高歌太平日往來林下定無違

寄陳性天二首

西嶽雲臺陳處士移家秋浦四無隣
先生虛室渾如雪夢在清都別是春
搥藥或聞林下鳥看花長悞世間人
我來更乞胡麻飯為爾題詩滿綠筠

汎掃天壇事老君即從年少悟奇文青童汲井朝分乳
玉女裁衣夜染雲水上赤魚還可駕山頭白鶴自成羣
遙知客去能長嘯月冷天空半嶺聞

三月五日飲於性天所有紫牡丹一本三花不
意池館邱墟之後復見于此

名花新剖麝囊開與客花時踏雨來越土一枝分閬苑
春風三朶出瑤臺朝雲重壓珊瑚樹宿露低傾瑪瑙杯
重憶當時歌舞處五侯池館錦千堆

雨中書懷

漢苑秦宮跡已陳
金沙一簇為誰新
山河有恨空懷古
風雨無情只送春
南國鷓鴣愁北客
東家蝴蝶過西隣
尊前莫唱昇平曲
白髮秋娘也自顰

過滄州有感

駟馬橋南曲逕賒
可堪重過故侯家
青袍杜甫重漂梗
白髮劉郎怨落花
憔悴已看身似鶴
娉婷不見髻堆鴉
野芳亭上春猶在
獨坐吟詩到日斜

讀胡笳曲

百年已到甲辰終休倚山河百二雄八駿何勞巡海上
一龍今見起江東專門學士空談道仗鉞將軍競策功
忍聽胡笳舊時曲此身飄泊歎秋蓬

雨夜獨坐

天陰十日不見星蟄龍欲起驅雷霆大風五月忽動地
急雨三更如建瓴剪燭西窗還獨坐辟兵南國幾時寧
可憐骨肉永相隔滿樹秋聲誰與聽

秋思三首

兩河兵合盡紅巾
豈有桃源可避秦
馬上短衣多楚客
城中高髻半淮人
荷翻太液非前日
花落蕃禧又暮春
莫上高樓望西北
遠山猶學捧心顰

翠柳無枝拂御堤
風來闔闔更淒淒
玉籠別主鴛鴦拆
金井啼秋絡緯齊
水上拾紅韓氏女
牕間織素竇家妻
傷心又送韶華去
直似黃河不向西

悵望知音阻漢臯
海門秋水欲成濤
鷓鴣未肯隨胡雁

燕子長教避伯勞
錦繡莫酬青玉案
琵琶空續紫檀槽
可堪獨閉簾櫳坐
花影鋪堦月正高

雨夜

寒夜悲吟似夜蛩
銀缸何事結花紅
愁聽風雨三更盡
夢在波濤一葉中
神女佩環歸楚館
鮫人機杼靜珠宮
連陰未解何由旦
翅濕南飛萬里鴻

至日二首

獨客無家望轉迷
山空木落氣淒淒
愁催短髮渾如鶴

病覺長身不稱屨書斷薊門天萬里棹經秦樹雪千溪
何由去學神仙術一鼎丹砂夜自泥

日上扶桑曉色紅閉門慵似杜陵翁干戈送老甘人下
江海生春尚客中雪盡南枝開大庾天回北斗挂崆峒
試傾百斛燕城酒未歎飄零兩鬢蓬

送桑子材歸麋塘

書囊未了復晨雞歲暮扁舟出大溪司馬倦從枚乘客
伯鸞欣對孟光妻山通石屋風烟合海接天河日月低

一路梅花千樹雪春來約我酒重攜

十二月十六日雨雪至十九日大雪次韻陳仲


謀

滕六春前試出奇三吳人賀太平時空山何處饒黃獨
半夜無風雨白黿梁苑一時賓客盛藍關千里逐臣悲
老夫坐看縱橫落醉擁鵞肩日賦詩

十二月廿六日蔡叔庸至翦燭聽雨

水氣昏昏接海邊清江狂客繫吳船天風十日河冰碎

夜雨三更瀑布懸寂寂春光歸柳上
匆匆離色在花前
故人著屐能相過翦燭西窗話昔年



清江詩集卷七

欽定四庫全書

集部

清江詩集卷八至

十

詳校官太僕寺少卿臣李廷欽

中書臣劉源溥覆勘

總校官知縣臣楊懋珩

校對官助教臣汪學金

騰錄監生臣王寶唐

欽定四庫全書

清江詩集卷八

明 貝瓊 撰

七言律詩

元夕

夜醉城南酒百缸，春來端使客愁降。
障開雲母東西一，燈射琉璃日月雙。
鐵笛仙人傳麗藻，金釵小妾度新腔。
歸來誤作三山夢，月色如水白滿江。

郊居

背郭茅堂低入燕通邨小徑曲縈蛇碧雞坊裏詩人宅
石鼈崖前刺史家流水暗通三徑竹曉雲濃掩一溪花
他年著我林間老垂釣共分鴻瀾沙

紅棣

時世新妝學內家漁人錯認武陵霞百年艮嶽空留樹
一夜春風為染花月裏嫦娥羞素服山中仙客餌丹砂
也知丰骨依然在雪後黃昏瘦影斜

蜀山圖

連峰接岫寫秦州雨洗蛾眉積翠浮石出劍門皆北向
水通鹽澤自西流松頭一片秋雲溼鳥背千盤細路幽
策馬匆匆度關客何如漁父一扁舟

庚戌中秋九思主人置酒予泊景淵副使子仁
理問同會時風雨驟作抵暮旋止天無餘滓
華月東出相與聯句十餘韻皆大醉就寢遂
忘所詠因復成一律

溪雲通月轉金盤石上移尊興未闌可惜少年今總老

莫辭良夜試同看
玉人不得攜王趙
詞客猶能敵孟韓
細數中秋知有幾
松花新酒更須乾

歸爻山寄楊德中丁一鶴

爻山即與浣花同
犬吠雞鳴處處通
卜宅定如唐杜甫
剖符須得漢文翁
荷歌夜雨衰猶綠
棗落秋風熟已紅
一鶴道人今可過
九龍山客試相從

庚戌九日是日聞蟬

今日出門風雨收
東山西山須可遊
那能東帶從王事

且復開尊破客愁
雁別紫臺初避雪
蟬鳴紅樹不知秋
桃花細菊應相笑
歲月無情自白頭

木芙蓉

萬里名花蜀上分
澄江渾似錦江濱
夜承仙掌三清露
春剪巫山一片雲
未許王家誇少婦
還從卓氏妬文君
所思欲寄知何處
雁斷天南日已曛

寒夜憶梅擬西崑

星河西轉夜初長
夢斷羅浮月在梁
青女五更欺病骨

玉人千里割愁腸
銅龍水滿聲催漏
絳蠟花銷淚作行
明發南枝應有雪
試從樹底覓春光

次韻陳仲謀

一夜秋霜入鏡中
靜觀諸妄已圓融
離禽自託寒枝小
病馬猶思碧草豐
出海雲霞無旦暮
經天日月自西東
危樓獨倚無窮思
心事何人得與同

次韻楊鳴鶴

玄圃滄洲願未酬
倏忽光景豈能留
江草江花還刺眼

春風春雨又從頭已知出處非同調且擬登臨為寫憂
君看南山盡松柏英雄何處葬眠牛

發草試筆

宮花無意插烏巾暫到金門遂乞身不用天官書上第
已蒙學士喚山人葛洪井畔應堪老范蠡湖邊又見春
重賦遂初慙造化狂歌痛飲樂吾真

遊硤石西山訪達上人坐天開圖畫所為設酒

脯

清明無雨試登山
丹井西頭一叩關
石戴樓臺飛鳥外
天開圖畫白雲間
杪櫺樹合陰初綠
躑躅花殘色尚殷
却喜遠公能置酒
老夫為汝一開顏

再用韻畲古道

宮殿如波湧兩山
上方不與世相關
望窮弱水三神外
夢在匡廬五老間
茶烹土銼旗槍碧
酒瀉銀瓶琥珀殷
聞有仙人葛洪井
丹砂乞我駐紅顏

送王熙易奉使安南

持節遙通五嶺南
酒闌插劍氣猶酣
海風不洗春冬瘴
山雨長和旦暮嵐
玉盃白浮椰子重
金盤紅擘荔枝甘
紀行定賦詩千首
蠻語時同父老談

京師雨夜呈宋景濂學士王子充待制張孟兼
主事

昨夜歸心已到吳
秋風相趣理荒蕪
蓬蒿一畝揚雄宅
桑柘千家范蠡湖
但覓丹砂扶老病
那能白髮事馳驅
題詩為謝京華客
秦駐山頭一腐儒

丁一鶴病愈見寄然且戒酒次韻答之

千年遼海歸來鶴骨相依然玉雪清康樂愛山元是癖
淵明斷酒信非情鄰人問字時時過野老知名處處迎
三月閉門纔一出南風萬頃綠疇平

送楊鳴鶴還鴻山

慷慨長歌行路難何鄉堪借一枝安
黿鼉吐浪江湖濶蟋蟀近人天地寒
田父朝攜新酒送山妻夜補舊衣完
只應去逐梁鴻隱萬壑風煙試獨看

題材上人遐觀樓

上方臺殿湧波濤萬里無雲見羽毛
滄海一杯流地底
雪山千仞小秋毫
天邊作客登臨倦
夜半驚人笑語高
猶有秦川公子筆為君題賦擅風騷

龍江道中

長江風浪走高桅
白首西遊第一迴
五色文章龍虎氣
六朝形勝鳳皇臺
草生白下連天碧
花近清明滿地開
一路好題詩百首
金閨使者不須催

送韓伯時歸山陰

中書落筆萬人驚，奉檄東歸也自榮。
十葉相傳忠獻貴，一官初授廣文清。
春歸故國花都謝，雨過空山蕝已生。
亦欲相從涉江去，千巖萬壑杜鵑聲。

贈王廷威

江南文物三槐後，傾坐郎君有阿戎。
酌酒初逢李監宅，說詩頻過杜陵翁。
騏驎裹歸天育結，綠縣慕待國工
插架書多須可讀，日長山院杏花紅。

壬子春二月丙戌天雨新霽卉木向榮遙睇紫
微復動遊山之興因述一首奉寄一鶴子材
復柬良佐諸友泊古道明遠大用默菴方外
交以訂其約云

東風日夜催花發花滿溪南路不分二月顰黃成鼓吹
四山金翠掃煙雲題詩尚憶維摩室酌酒重登帝子墳
如此風光君莫負畫船歸載石榴裙

寄縻孝子

幽湖老人七十餘一身如蠹隱圖書朝廷不起常夸甫
鄉黨已知徐仲車海燕定巢來屋裏林鳥得食上階除
雨晴有興即相過一葉小舟通竹渠

寓幽湖客舍

附考桐鄉縣志范蠡塢在濮院相傳少伯泛湖同西施過此宋景濂

濮川八景詩有
幽湖明月一首

我無太古明星宅白首西東寄此身已免崎嶇投劍外
敢辭寂寞老江濱枇杷結子初肥雨芍藥留花不見春
萬古乾坤同逆旅兩山風月屬詩人

送朱顯道赴濠上

將軍五月過盱眙
雪浪樓船快馬馳
天地重開新造國
山川多紀壯遊時
千屯霧合耕耘處
萬里星奔貢賦時
却向秋風候旌旆
南還莫負雁前期

試院中和常景元韻

野老何知近上台
高堂夜坐曙鐘催
采珠滄海元無價
懷璞荆山信有材
三月龍門須快躍
五更魚鑰未曾開
却思年少多英氣
也赴槐花此地來

中秋試院和馬新仲是夜無月

花落銅盤蠟炬殘風簾讀卷未能安地分甌越秋多雨
人在蓬萊夜更寒敬禮每煩陳俎豆清談仍喜接衣冠
獨無仙客知微術天柱峰頭借月看

九月望日錢塘瑤瑤寺僧照覺原過幽湖讀書
所出示詩數篇因其別也走筆為贈且有紫
微山之約云

野老讀書溪水南渾如杜甫百花潭安得仙人來七七

且從禪客語三三山多秋雨都荒菊樹著新霜未熟柑
更約葛洪丹井上好詩連夜為君談

癸丑元日喜雪因攜酒過來青堂招諸生共飲
夢覺黃雞唱已三隔窗聲碎飼吳蠶驚風夜半愁回北
瑞雪春前雨過南攜酒試從田父飲買花那稱老人簪
豐年有象應堪卜滿意來青共笑談

寄材大用言默菴暢明遠

中秋看月醉流霞月裏杪羅又落花老去繙經思古寺

春來乞食向誰家三山弱水元無路七寶恒河更有沙
他日升堂重論法莫嗔身坐白牛車

臨平道中

三月六日好天氣臨平湖上酒船開青山如鑿自高下
白雲不收時去來道上看花多踟躕林間伐木到楊梅
如何也趁西風燕遠過錢塘又一迴

一鶴道人回爰山未遂盍簪先以詩寄之

三日不見已為疎別來忽復一秋餘檣李城邊又回雁

桃花水生初上魚可無薄酒試留客定有新詩能起予
絳蠟雙葩連夜結即聽鳬鷁到堦除

送王克讓歸湖南侍親并柬李中卿縣丞

五兩風生楚客歸夢魂先已到庭闌九疑舜冢蒼梧野
三國周郎赤壁磯天地茫茫人自老古今歷歷鳥空飛
若逢李白煩相問別後平安二字稀

五月三日登閣東望西溪白蓮燦然如雪徙倚
久之為賦

地清無暑即蓬萊高閣披襟亦快哉
楚樹日沉風北起
鍾山雲合雨東來
枇杷子熟三時過
菡萏花高一色開
今夜夜涼無限思
吹簫人在鳳皇臺

送趙澤民歸越中

天末秋風生白蘋
連環入夢客思親
蛾眉下嫁終傾國
猿臂須封莫問人
禹穴讀書今幾歲
蘭亭載酒約新春
翰林供奉如相問
為說愁添雪滿巾

送江西僉憲趙宗典移守合州

今日梯航萬里通使星一點向秦中蠻夸十月無冬雪
山水三巴有閩風須可賦詩邀杜甫即看為政似文翁
珠還合浦元非異但慶三田黍稻豐

送朱伯良赴隴西縣丞

鞏昌風俗今猶古城郭弦歌足幾家渭水北來同穴近
隴山西過武功賒天連苜蓿荒秋雨地種葡萄壓紫霞
更喜清官有朱邑明年新政萬人誇

送莫彥英赴賓州上林丞

十月西征天氣寒
兩江今日靜波瀾
蠻夸萬里皆唐制
齊魯諸生盡漢官
榕葉似雲垂滿戶
荔支經雨喜登盤
柳州刺史文章妙
公退從容好細看

送醫師張仁齊

縣壺長向市中藏
海底龍公夜授方
廬阜仙人知董奉
長安女子識韓康
藥存九轉芙蓉暖
松化千年琥珀香
暫到京華即歸去
一毫榮辱總相忘

贈龍虎山鄧子方鍊師

鬼谷仙人弱水東身騎一鶴御青童坎離龍虎蟠金鼎
日夜神明守絳宮筆埽琅玕三竺雨琴彈霹靂滿林風
白頭欲問長生訣笑我京華尚轉蓬

二月一日病中口號

新年尤苦病相侵白髮無端自滿簪五柳先生蓮社約
四明狂客鏡湖心滿城風雨花時過曲水東西草色深
明日兩峰茅屋下故人持酒一開襟

送楊九思赴廣西都尉經歷

叩笮康居路盡通西南開鎮兩江雄漢家大將推楊僕
蠻府參軍見郝隆象跡滿山雲氣白雞聲千戶日車紅
明珠薏苡無人辯行李歸來莫厭窮

新晴

扶桑日上海門東野綠山紅在眼中流水轉龍分別浦
斷雲如鶴趁歸風雪色一時開菡萏秋聲五月到梧桐
白頭病客鄉心折獨愧登樓賦未工

送朱質夫赴寧遠知縣

萬里番禺自漢通，乘槎有客氣如虹。
地分銅柱風煙外，山湧瑤臺雪浪中。
帝子旌旗何處問，黎人衣服與時同。
興來好和蘇公語，又度西南月半弓。

梅泉處士虞長卿挽詩

先生出處任乾坤，四十不登金馬門。
長者已稱如石建，孤臣終惜棄虞翻。
天寒柏樹無乾淚，月落梅花有返魂。
季子繡衣霄漢立，風流文采喜猶存。

送詹同文承旨還鄉

奉天殿下親承詔老著黃冠出紫薇萬里雲霄雙鶴去
時內苑九江風浪一帆歸春前載酒黃泥坂月下吹簫
縱二鶴赤壁磯文采昭回看帝製山中草木盡光輝

贈韓友中

雨花臺下古仙客門俯百尺玻璃江青山偃蹇自相伍
白鳥浮沉時一雙天寒饒藥龍蛇窟夜永讀書風雨窗
紛紛市人不足數與爾笑談傾百缸

和張思廣九日韻時王景行有約阻雨不赴

秋藕無花寄斷絲，拒霜猶學漢宮姿。
錦袍江令還家早，白髮秋娘對客悲。
剩水殘山留勝槩，酸風苦雨失幽期。
未慙寂寞陶彭澤，更把黃花盡一卮。

鳳凰臺

鳳皇一舉周八極，金陵猶有鳳皇臺。
萬年龍虎自盤踞，此日鳳皇須復來。
隴西太白已無跡，江左夷吾真有才。
登高送客多古意，長歌慷慨共持杯。

秦淮對月

大江流月浩漫漫一鶴南飛尚未安素練秋垂銀漢濶
神珠夜吐貝宮寒胡雛感粟霜中起商婦琵琶水上彈
惆悵故人千里隔小樓十二獨凭欄

送呂元振歸四明

千里東歸訪故園春深滿目野花繁山橫鳥道如龍轉
水落蛟門尚虎蹲賀老風流誰復繼舒公氣節更須論
故人為謝崔文學何日聽詩酒一尊

乙卯清明日偕馬新仲李守中劉志遠遊聚寶

山過泐季潭長老三塔院飲於志遠宅

城南看花花正開
清明微雨灑塵埃
路從周處臺前過
山轉曹彬廟下來
墮地遊絲輕復起
近人嬌燕去仍回
高歌擊節狂歡賞
共盡三春酒一杯

次韻夏士文

故人不見十年餘
長憶故人看舊書
直從渠象山頭至
相過鳳皇城裏居
白雪翻匙共野飯
銀刀出網分河魚
從來陶令苦迂僻
只擬東臯歸荷鋤

題王顯宗巡歷圖

六月霜威見直臣
繡衣玉斧大同巡
山分駝脊高中土
路折羊腸恐遠人
今日邊戎應辟馬
從來漢使獨埋輪
白頭校字慙年少
為客京華又一春

分教中都

中都學舍今百區
聲教遠及萬方初
新羅百濟亦遣子
期門羽林皆讀書
一時復見制作盛
四境已安攻戰餘
老夫竊祿愧無補
惟解區區校魯魚

苦雨淮水泛溢往來不通緬懷南京故人劉子
憲

寒猶挾纈思南國老更看書坐北窗白雨三時如倒海
黃流一夜盡成江榴花支子開無數鷓鴣鷓鴣下作雙
天上故人何日見劒心詩思未能降

次韻方文敏秋興五首

地拱皇陵松柏深君王法駕幾時臨漢宮甘露曾聞昔
周室豐年豈自今太史已刪金匱錄詞臣應製鳳臺吟

憶陪仙仗千官入春日新鶯在柳陰

一日龍飛濠泗間
橐駝牛馬走闐顏
已來肅慎通滄海
更却呼韓閉玉關
使者旌旗分道出
將軍部曲凱歌還
白頭野老知何事
紫氣常瞻萬歲山

天限長江雪浪浮
臨江百尺起朱樓
春風秋月歸新恨
楚水吳山憶舊遊
已沃腥臊無朔漠
從來壯麗有西州
萬年大業如磐石
四海諸侯盡綴旒

錦城春色醉芙蓉
甲第樓臺有幾重
萬里黃河遙北注

一丸函谷小東封生常客寄悲工部老托官聯忝辟雍
始信童謠應千古浮邱一馬化為龍

西湖一雨始知秋水碧山明散客愁何日仙人留白石
當時宋祖戰清流銀河接地西南界玉氣通天日夜浮
懷古登高無限意暮雲千里重回頭

丙辰元日時在鳳陽趙穆仲方文敏王繼遠枉
騎相過

今年元日漢鍾離著處簫鼓太平時老夫畏酒復多病

好客到門能說詩
春前春後雪纔見
水北水南花更遲
却憶華堂高會處
玉盤纖手送青絲

題洪大隱傳後

黃冠野服共逍遙
七十何曾諳市朝
傾國楚妃端不嫁
入山商皓若為招
田中雲實收雙玉
樹底風聲厭一瓢
化鶴却歸遼海路
上林無處問漁樵

賦晚菊黃白二本

引蜂勾蝶過紅墻
千葉新花只道妝
仙質曉勻胡粉白

御袍秋染鬱金黃東家欲闔西家艷十日元同九日香
可笑當時彭澤令清如楚客在瀟湘

秋日漫興

青楓葉赤雨新霜倦客栖栖自一方已愧公孫疎學術
浪傳司馬擅文章天寒老驥愁長路日落孤鴻沒大荒
何日兩山陪野叟一談一笑共相忘

次韻楊秉哲錄事見寄二首

堯封北盡薊門寬執戟楊郎喜調官幕下賦詩諸客避

馬前射雁一軍歡人材今日收孫楚相業從來許謝安
無限江南好山色他年歸約老夫看

一曲西湖晝畫間花時載酒正紅顏鄒枚上客團車蓋
燕趙佳人結佩環甲第樓臺分處處南朝事業尚班班
傷心可得重行樂空愧沙鷗白鷺閒

病中寄方文敏

一秋已過春復回柳條梅萼定相催淮南病客惟高卧
雪後故人今不來詩卷暮年愁總廢燭花清夜喜還開

東軒風月與誰賞
新酒雙行琥珀杯

早春寄黃仲真

樂全先生七十餘
樂全堂深花事初
山中酒熟試留客
竹裏日高時讀書
黃冠野服真自稱
赤車駟馬今何如
相知還有惠施在
適意共觀濠上魚

鳳陽晚春

愁聞杜宇還催客
老向鍾離又過春
洞隔水簾迷絕境
山名雲母憶仙人
牛羊自放空却晚
燕雀交飛甲第新

載酒看花同一適百年蝴蝶夢中身

送馬伯溫之廣西

樓船椎鼓發江中昨夜檣烏喜北風
可惜春歸還送客何知別後已成翁
浮天雪浪三湘濶到海雲山百粵通
有子漢陽專簿領一緘千里託飛鴻

送王用中歸金陵以有親迎之期因并及之且戒其進學

王生別我向長干門第從來盡達官
水落瓜洲初雁到

山園建業尚龍蟠秋風客路嘶驄馬月夜仙壇會彩鸞
金印虎符來未晚莫忘重把舊書看

賦西山爽氣亭二首

屋外雲山走海濤高歌扣角氣猶豪把琴有客尋陶令
拄笏何人記馬曹生厭市聲從地僻老增詩興敵秋高
九峰三泖何如此金谷池臺半野蒿

朝朝攬翠一凭闌田里從教嬾不冠夢破喜聞秋雨霽
神清疑對雪峰寒霓裳琴曲傳三疊石鼎車聲出九盤

南北馳驅亦何事西方塵土沒征鞍

送王以寧歸建德并柬魯道原

睦州城郭風煙外亂後衣冠喜尚存
山倒半江雲氣合灘回七里浪聲喧
讀書才子初還舍買酒鄰翁盡到門
相見魯公勞問信春秋何日試重論

方文敏惠二白瓶及新茶土鐵

建溪春茶風露潔赤城海錯波濤腥
老夫不費百金字遠道忽來雙玉瓶
古井汲泉動夜月高堂酌酒呼張星

江瑤荔支亦可並既醉高歌誰與聽

聽松樓

忽從何處聞蕭瑟樓外長松一萬栽
隔屋嘯歌聲自和滿山風雨夢初回
華陽真逸元同趣太白仙人信有才
貴客焉能辨天籟哀絲豪竹送蓮杯

留別陳敬夫

天低海上山如黛雪盡淮南柳未黃
浩蕩春光還自好飛騰暮景為誰忙
膏車秣馬歸應急把酒論詩樂未央

明發匆匆又南北有書時託塞鴻將

寄燕府錄事楊秉哲兼簡新民蘊德二紀善

西蜀揚雄苦著書相逢長憶武林初
廬前王後名非忝楚尾吳頭跡更踈
花柳春連朱邸靜星河夜落大江虛
已知老病慙英俊且復從容好曳裾

題梅軒

枝南枝北花無數夢在羅浮海上村
白雪已空天下色黃昏曾返月中魂
水仙樊子宜相近瘴雨蠻風定幾番

今日賦詩須我輩何人東閣與重論

洪武六年五月初一日早朝奉天殿時西域國

師來朝蓋前代所未有也目擊盛事因賦

中天宮闕絢琉瓈五丈高懸日月旗天子萬年當玉座
國師五月拜丹墀御爐不斷龍涎噴宮扇初交雉尾移
江海小臣陪百辟白頭今日覩朝儀

爰山隱居夏日

病客從教嬾出邛兩山一月雨昏昏野花作雪都辭樹

溪水如雲忽到門無復元戎喧鼓吹從田父牧雞豚
來青處士時相過猶是平原舊子孫

清江詩集卷八

欽定四庫全書

清江詩集卷九

明 貝瓊 撰

五言排律

書事二十韻

父老歌延祐君臣憶至元清光回日月喜氣入乾坤不
意經淪喪相圖事并吞索駝空大漠騏驎死中原浪信
傳三捷深憂病七奔關中防豕窠河內且蜂屯流血今
千里傷心遠五門羽衣悲弟子寶玦泣王孫管葛真難

致孫吳莫易論如何輕大業俱是竊殊恩近報中台圻
遙瞻北極尊狐狸號白晝魑魅嘯黃昏貢賦時時急征
徭處處繁故園荒草迳何處覓桃源野外朱旗閃城頭
畫角喧飄零從老去局促偶生存醉憶劉琨舞狂興阮
籍言登臨空灑淚去住總銷魂水閣秋鴻落霜林夜鵲
翻相知共南北不得問寒溫

李子庚挽詩

屢入元戎幕曾陪御史驄一身辭汶上萬里入閩中東

觀文章妙西州將略雄艱危真自許敢決更誰同斬馬
求蕃劒號猿拓楚弓行師百道靜破賊兩關通擬復堯
封大重開漢業隆觸蠻猶可鬪鷹隼若為籠重霧朝埋
日長星夜隕空柱天徒有志填海竟無功已竝田疇義
皆知葛亮忠江風吹獨樹山月照幽宮英氣寧為土神
光或吐虹尚憐諸子在國士有遺風

黃灣述懷二十二韻寄錢思復

附考黃灣
屬海寧

海岱初雲擾荆蠻遂土崩王公甘久辱奴僕盡同升遠

適將妻子端居謝友朋草堂森苦竹瓜圃蔓寒藤地盡
山光斷天昏海氣蒸夜深常畏虎秋後更多蠅鶴髮愁
難理烏皮懶自凭娉婷羞不薦齷齪怯先登拔劍歌誰
和聞笳寢復興過逢欣已絕疾病恨相仍自擬秦民去
重須魯使徵吹毛多見摘刺舌尚須懲耆老惟君在文
章對客矜才全懷白壁道重比朱繩虎榜名非忝雞林
價盡增極知童子陋深愧大巫稱最憶春停騎高談夜
翦燈病駒終棄擲生鶻必飛騰跡已從信屈時多任愛

憎賦詩閒莫廢好事老猶能漢月今頻滿天河本自澄
山陰有孤棹雪下興還乘

題空翠軒

萬竹如雲盛琅玕起石邊分枝巢翡翠解籜化蜿蜒黑
映瀟湘雨青浮鄴杜天含滋團隊露倒影漾清漣不奈
蟬號夜深期鳳至年小冠知隱者虛室候神仙月上南
榮坐風清北牖眠壁魚乾縹帙海鶴操朱弦結友多裘
仲封侯薄渭川忘形日相對秀色更娟娟

丁未除夕

東風來日本北斗辟玄枵坐竝華櫬陰班違紫禁朝清
觴陶令節明燭炳通宵曲付蛾眉唱香漆鵲尾燒俗傳
儼逐厲事類博成臬舊疾應全減新歡且共要壓城雲
暗度侵幔雨斜飄紅折叢梅萼青緘弱柳條明朝還獻
歲更頌玉盤椒

擬香奩八詠

黛眉顰色

纔歌愁易歛欲畫思難任雨過峰猶濕春歸柳未深漢
宮休競學秦鏡莫重臨不是嫌施粉翻疑病捧心曲如
天上月纖似樹頭禽盡日窺青鎖如何別到今

香頰啼痕

何限相思淚年年苦別離當春羞客見終日為君垂落
粉和雙玉殘紅界一絲仙人辭漢日公主嫁胡時鳳蠟
流應少鮫綃拭已滋空彈銀甲盡却恨錦書遲

花塵春跡

羅襪凌波小潛行輦路中東風吹不散南陌去誰同艷
想蓮雙圻痕留月半弓定知爭拾翠應怕踐殘紅喜蝶
無情撲靈犀有意通如何珠百琲小妾妬翔風

雲窗秋夢

朦朧欹玉枕蛩語夜何長羽化為蝴蝶神遊躡鳳皇金
屏殘宿火翠被怯新霜不識天涯路相逢馬上郎關山
度遼水雲雨會巫陽不奈風鈴攪驚回月半床

繡床凝思

丁香花百結宛轉若為生
蛺蝶描初半鴛鴦刺未成
重將藕絲續獨看柳花行
入戶羞雙燕停針怪一鶯
乃知天女巧翻為雪兒輕
困懶春猶劇無人識此情

金錢卜歡

字憶開元日清光尚自全
不知人遠近猶似汝方圓
一別烏衣後三回白雁前
芳心偷自祝吉語定真傳
玉兆符龜灼銀河待鵲填
可能如子母無術學神仙

月奩勻面

新粧自時世寶鏡拂塵埃妬雪重施粉看花莫近臺春
風玉樹竝秋水白蓮開瘦怯空光照嬌憐顏色回初酣
妃子酒更點壽陽梅有約西園會鄰娃不用催

金盆沐髮

髮亂朝新沐蘭湯試手慵色衰空自潔人遠為誰容花
委隨飛鳳水動浴蟠龍到地青絲滑掩月黑雲濃向日
晞初薄臨風綰更鬆休疑華山女此地復相逢

對雨

朝雲纔觸石夜月又從星霹靂開三峽滂沱覆四溟寬
憂稱兇爵志喜續麟經即恐蛟龍怒那知蜥蜴靈潤添
未忝色清挹芰荷馨戰伐今應息謳歌且復聽常希流
麥鳳試聚讀書螢倚杖前邛望平波綠滿汀

辛亥歲燒燈日張彥臯攜酒相過與楊鳴鶴丁
一鶴陳仲謀及諸門生十有二人共飲因以
笙歌歸院落燈火下樓臺分韻賦詩余得歸
字

節過傳柑後餘寒襲故衣雪從梅上盡春向柳邊歸且
復從人飲何須密伎圍金吾猶不禁鸚鵡試頻揮上客
推文靖仙翁得令威交遊知有道笑語共忘機細雨朝
還作高雲夜不飛玉簫停鳳曲銀燭繼蟬輝但覺新懽
洽應知舊事非莫辭同潦倒良會古來稀

士子夏端居二湖與二三子讀書而苦熱如焚
一座四遷杜少陵發狂大叫非過言也回思
雲間時往來呂邵二族其地有林藪之美池

臺之勝可以避暑而遊士寓公咸會於此相
與窮日夜為樂及兵變之後所至成墟海內
忘形半為異物感衰榮之無定悼生死之相
違遂成三十四韻麤述其事云

地僻從吾放山深少客過昏昏蒸酷暑鬱鬱抱沉疴斷
酒愁為敵拋書睡作魔雲生空望雨水涸不通河唱和
聞蛙吹遨遊記鶴坡輞川移絕境瀑布激懸波數子論
新好諸翁樂太和百篇齊屈賈

楊鏐
崖

五字逼陰何

鄭本
初

共哂佯狂徹

魯道原

焉知好辨軻

馬文璧

冰壺清莫比

夏景淵

鍊硯老猶磨

呂德厚

公子時同載

夏士文

將軍夜不訶

邵資谷

結交真有道

倪菊存

與物總無他

倪耕閔

每喜方舟坐何煩

信馬馱秋風千戶竹宿露半池荷席賭藏鉤令亭邀竊

藥娥

有宿月亭

頗黎行凍蟻瑪瑙進寒罽潦倒衣從濕歌傾

弁或俄胡雛能感粟漢女善顰婆對舞翻朱袖羣謳歛

翠蛾紛紛方大噓浩浩漸微醺壺中恒三馬詩成愧一

螺如何棄俎豆却復老干戈落雁長淮遠蜚鴻大野多

死生俱異域出處不同科
淚泣荆人玉腸回織女梭
祇憐成骭髀及此歎蹉跎
室已如懸磬門今信設羅
凌霄縈小草平地引危柯
水鳥浮沉戲林蟬斷續歌
分甘留白屋身免束青縞
晚牧幽湖上春耕曲礪阿
丹砂尋舊井金剎過祇陀
豈復同般樂應知廢切磋
茫然感平昔興發強吟哦

丙辰立春日大雪二十韻在鳳陽作

正月淮南雪空花五葉纖
隨風成唾玉平地出形鹽
重

拆鴛鴦瓦輕穿翡翠簾色迷雲外鶴光掩月中蟾河水
冰猶合崑岡火復炎方圓知有道先後亦無嫌歲旱今
方劇春寒更覺添夜深聲淅瀝天近氣清嚴鮫女愁停
杼雞人誤報籤一時延勝賞萬里入遐瞻路失羊腸曲
山呈馬耳尖炊煙空近市急溜斷虛簷林鵲饑爭啄川
魚畏却潛往來聽杖履歌舞起閭閻研凍詩重賦瓶存
酒試拈節高貧士卧時信老農占獨樹危能立枯黃潤
總沾宮妝梅粲粲野秀麥蘄蘄白首歌誰和朱門味可

兼謾思金帳客痛飲正厭厭

曉菴山水小幅

高堂見林壑忽似過雷峰窈窕一門險崢嶸千嶂重人
聲何處答虎跡有時逢怒瀑流清耳層雲起盪胸松枯
寒落子草碧暖勾茸勢出丹青假神疑造化鍾滄洲非
世外玄圃亦王封絕境須吾賞他年策瘦筇

七言排律

奉和鐵崖先生水仙八韻

千葉名花閨苑移濃香百和為熏肌玉翹半脫春如醉
翠袖輕扶夜更癡賦就陳王空自怨珮遺交甫至今疑
承恩不向金塗立入道初將羽帳離步月有時羞素女
行雲無意妬瑤姬水邊寂寞誰能賞林下風流總未知
腸斷三生孤舊約眼明萬槁出新枝朱絃五十閒瑤瑟
黃九為君重賦詩

題周伯昂水邨圖

愛爾讀書陽羨里喬林古木五湖東山如城郭銅棺泣

水落田疇盡通野老猶能說周處仙人何許覓張公
園收橡栗霜初重飯煮桃花歲屢豐馬隊豈堪延祖企
草堂今復見盧鴻已知貢賦隨時給還笑衣冠與俗同
一艇微茫在烟浪采菱歌斷夕陽中

紅菊

日照東籬爛若霞誤驚春色到山家宮人曉殢葡萄酒
道士秋開躑躅花莫擅鵞翎欺白雪未論鶴頂養丹砂
霜中苦節知誰竝雨裏寒香只自誇寂寞也羞彭澤陋

風流還競洛陽奢移樽九日來同賞插帽休譏老孟嘉

鶴山親舍詩

并引

富春為吳孫權之里權大父鍾嘗種瓜瓜美
有三客謁之鍾為設瓜既而指示鍾葬地化
鶴而去故名棲鶴邨其地有黃花洞世傳黃
石公所居洞有石床尚在每風雨輒聞兵甲
聲天霽則石床隱隱有文見可識琅函二字
余友李巨川與母隱於是遂題其室曰鶴山

親舍元至正中會稽楊鐵崖先生數遊洞中
必過巨川飲竟日忘返

我愛郎君似老萊移家歸隱碧山隈赤城舊令尋常過
白髮慈親八十開亂後桃花還自發秋深檀木更須栽
炊煙幾處相連接雲氣無時共往迴泉出龍蛇多枸杞
石蹲虎豹盡莓苔賞心最憶黃花洞亦擬他年跨鶴來

送馬本道赴潁上

悲歌把酒氣仍驕幕府藏名怕折腰萬古山川豪俠窟

一時文武聖明朝牛羊滿野秋俱放
貔虎連營夜不羈
馬援已衰猶矍鑠少陵多病且逍遙
當筵落筆烏絲濕
挂劍看書絳燭銷我愧白頭居太學
雲林唯待伴漁樵

清江詩集卷九

欽定四庫全書

清江詩集卷十

明 貝瓊 撰

五言絕句

題畫

水通銀漢遠山對赤城高一曲瑤臺路春來盡碧桃

七言絕句

寄陳文舉四首

鳳皇臺下猶為客雪滿頭顱一病翁却憶山人讀書處

月輪夜照水晶宮

秀州西去湖州近幾處樓臺罨畫閒借我釣魚舟一葉
坐看七十二青山

金刀火齊元非物但取乾坤與坎離采藥芙蓉凌弱水
三山何路覓安期

當年我欲醫君癖今日君應笑我狂一曲雲林天定許
野猿山鳥未能忘

雨後偶書

海門雷電夜隨龍
江黑風高雪浪春
今日看山雙眼碧
插天金翠萬芙蓉

陳進善見過

南風綠樹午陰圓
好客聯鑣過海邊
可惜紅顏成白髮
風流却話十年前

對菊

高僧已送鷺翎白
好客仍分鶴頂紅
秋日兩株開爛熳
晚花原不嫁東風

別侯春燕

蓮子有心元自苦楊花無蒂若為生
錦機織字難成匹
玉局彈棋恨不平

勝南洲紅梅

龍門狂僧老萬回燕支常染玉堂梅
木杯何日過東海
拾得海底珊瑚來

西湖竹枝

六月玉泉來看魚湖頭雨過盡芙蓉
芙蓉花開郎更遠

玉泉魚少亦無書

贈小南枝

相逢彷彿在西湖
姑射仙人玉雪膚
春淺芳心渾未透
天寒翠袖不勝扶

城南絕句三首

祇樹園荒客不來
金銀猶指舊樓臺
風林日落烏爭噪
雪片春遲花未開

流水縈迴一道斜
隔林雞犬兩三家
雪深藥塢迷行徑

潮落春船閣淺沙

已從春草長
閑門風雨連
朝不出邨
老婦煎茶燒土銚
故人送酒滌山樽

清明日三首

二月楊溪花亂開
黃鬚紫萼斬新栽
春到清明已如客
看花一日定千回

出門今日向何處
花惱山翁走欲狂
此身忽已過半百
直須爛醉答春光

北里南隣日日過
花開不飲竟如何
庭前昨夜暫相賞
地上今朝應更多

枯棘雙禽

山禽白頭如老翁
一雙相命復相從
秋田無禾苦不飽
下上胡為荆棘中

道中見梅

烏龍井上初銷雪
白鶴山人又見春
須可百回來繞樹
莫教一片落隨人

東邨漫興二首

溪上秋風老拒霜居人星散似淮鄉誰家十五琵琶女
就客能彈陌上桑

八月雨多新水生邨南邨北斷車聲老夫不識市朝變
但與野人歌太平

茗溪陸文寶挾筆過雲間持卷求余言而一時
縉紳之作不啻百篇有論筆法自趙松雪用
落墨而始廢者有為筆卦者近世膚學小子

率意妄作類如此可歎也已因賦五絕

近代何人下筆精吳興松雪最知名欲過大令歸前輩
競學中郎耻後生

吳興松雪真奇士書到通神逼二王謾有兒童誇竝駕
更無弟子得升堂

退之作傳聊為戲子雲草玄真好奇更有區區工畫卦
強分奇耦學庖犧

石鼓鐫功元自缺秦碑頌德久應訛一時篆籀今誰解

白髮江南玉雪坡

謾禿霜毫臨北海更求雪繭寫蘭亭也知不改無鹽陋
浪抹青紅鬪尹邢

立春後五日

北風夜吹碧海凍立春以來仍苦寒城南酒貴更須買
江上花遲誰與看

次韻邵筓谷暮春三首

處士渾同鄭子真水南結屋與山隣已從竹筓生旁舍

不遣桃花誤世人

一枕槐根午夢長
不知夢裏別春光
禽工唱和偏能熟
蜂苦經營也自忙

櫻顥紅垂山雨晴
荷錢綠卷水風生
佳人莫惜頻行筆
狂客從教醉絕纓

題紅梅

山杏一株臨大路
宮桃千葉倚空牆
如何永雪羅浮女
也學春風半面妝

漫成四絕

今朝無酒只清坐落筆猶有氣凌雲天下黃金賤如土
何人為購相如文

東隣昨日收白骨西鄰今日啼青娥傷心又過中元節
城下招魂應更多

平生落落苦難合十五讀書今老翁却怕秋來添客思
梧桐昨夜又西風

南金大貝亦何物六月胡商死道遶滿地清陰日停午

老夫高枕北窗眠

赤城呂徽之博聞強識宋亡遂晦不仕一日大雪中至巨家易穀立堂下久之堂東偏衆客方詠雪有分韻得蝶字者苦思不就徽之不覺失笑咸詰之曰汝何笑曰吾欲用滕王蛺蝶事耳衆客皆驚陰知其為徽之也延之坐不可欲賙以穀辭既去使人尾之至其居地極幽阻及雪霽候焉荆扉竹屋不蔽風雨見

桶中坐一婦人蓋其妻也問徽之所在曰出捕魚矣得於溪上具言所以求之意曰諸子可少留乃換酒共飲返宿道旁大樓下主人怪輿馬之盛因言其狀主人亦不知有徽之也明日求之則已遷居矣徽之嘗與陳剛中相遇於道剛中下驢揖遂問乘驢故事各舉一事至四十事而剛中止矣徽之曰吾尚記其事出某書凡二十端後不知所終

空山積雪深一尺車馬何來野老疑溪上捕魚歸換酒
更無人識呂徽之

別徐楚芳

別愁如劒割人腸空灑西風淚萬行楚尾吳頭各千里
相知從此不相忘

倪雲林小景

雲林筆力如王宰剪斷吳淞水半江更須著我扁舟坐
閑看飛來白鳥雙

聞箏

白髮潘郎工錦箏江南江北盡知名
雙手重彈白翎雀猶是黃龍塞下聲

己酉重午

風雨端陽生晦冥汨羅無處弔英靈
海榴花發應相笑無酒淵明也獨醒

歸東郊偶成二首

愛酒狂生老未逢十年蹤跡滯吳淞
歸來鄉黨都非舊

不及青山向我濃

海上逃生萬死餘
亂兵初定且安居
封侯萬里須弓馬
錯教兒童盡讀書

客爰山偶成

春逐啼鶯去不留
一川風雨滿山秋
笙歌不到愁人耳
若聽笙歌更淚流

過無錫

水抱新城缺月彎
城頭高似九龍山
將軍已縛山中虎

道上行人日往還

土橋

數家星散土橋西
苦雨酸風叫竹雞
一夜破窗愁不寐
願回白日照春泥

丹陽得風

出門平地即羊腸
白髮應添鏡裏霜
今日天風亦憐我
盡情相送過丹陽

題杏花

日光雲氣曉相叅一路新花似酒酣
記得少年遊賞處
春風信馬過城南

夜發

歸人不寢夜如何月滿溪船唱越歌
彷彿吳淞江上路
別愁一夜上心多

三月廿五日夜口號

破鏡五更飛上天北林烏啼驚客眠
勞生擾擾亦何事
溪女溪童相盪船

辛亥重午

去年重午憶嘉興風雨龍河一病僧
今日山中又重午故人持酒說金陵

辛亥七夕五首

子晉吹笙學鳳皇緱山一別已千霜
當時黃屋非無意豈有神仙到帝王

阿母西來降漢家剛風萬里送飛車
空留千載蟠桃核白髮劉郎不見花

五夜天邊輟鳳梭
長生殿裏望銀河
玉環他日無窮恨
更比牽牛織女多

東家西家爭曝衣
我但曝書誇小兒
壁中科斗古文字
猶有射天光陸離

性拙如鳩本自偏
柳州何必更祈天
人間機巧知多少
無復三皇五帝前

澄林冬日

連邨桑柘猶存葉
一樹枇杷已著花
十月澄林好風景

恰如秋浦野人家

贈別

一南一北鳥辭母一東一西花送人與君此別似送鳥
對酒那不惜青春

讀書所有白花一株狀類揚州瓊花而花損一
葉俗稱為八仙云為賦一絕且悼瓊花之不
復見而獨見此也

一夜東風吹白雪化為蝴蝶過西家七香車遠人何處

空認唐昌觀裏花

十月廿九日過永昌寺訪照覺原

幽湖水落夜初永湖上雲山翠百層一箇小舟輕似葉
西尋瑪瑙寺中僧

春情

新來不畫遠山眉翠被春寒起更遲靈鵲定知人有喜
一雙飛上萬年枝

西湖竹枝

聞郎北過李陵臺湖上荷花今又開那似岳王墳上樹
枝枝葉葉盡南回

題松下丈人圖二絕

長松百歲走蒼蛟日夜松聲如鳳匏山人有約賦歸去
我亦來借白雲巢

仙人手曳九節杖行看好山應未窮石間三秀食可飽
一曲試和商顏翁

題扇

冰紈一尺寫修竹瑟瑟清風生夏寒不見江南鐵鈎鎖
總成石上青琅玕

題紅梅二首

紅羅亭下又春風小鳳飛來樹已空後主當時歡宴處
新花如火照唐宮

野橋山店記年時管領春風有一枝却笑羅虬不解事
百篇空賦比紅詩

早秋

白髮新來不滿梳
玉簫金管總成疎
梧桐院落秋風早
一夜神清喜讀書

題溪山春曉圖

仙家雞犬白雲中
水複山回路不通
萬樹桃花春似海
莫教重誤打漁翁

山家

鉏豆南山八十翁
相逢笑語夕陽中
門前一箇冬青樹
不學桃花似酒紅

題馬文壁畫二首

長憶秦溪馬文壁能詩能畫最風流
酒酣落筆皆天趣
翦斷巴江萬里秋

田家一簇江南路
草閣柴扉近水開
人背夕陽巫峽去
雁將秋色洞庭來

題凌波仙

姮娥竊藥能奔月
羸女吹簫亦上天
萬古阿甄魂魄苦
江清雪冷夜如年

送成德琦兄北歸

雲中歸雁總成行
腸斷連枝尚異方
春滿江南江北路
柳絲不似別愁長

墨梅

雪後尋梅恐未真
花光一日寫花神
廣寒玉兔分秋穎
翦斷羅浮萬樹春

夜宿王繼遠白雲半間

吳歌但少玉童雙
且盡仙家酒百缸
一枕梅花清夢遠

不知夜卧白雲窗

題徐雪洲墨菊

先生愛菊似柴桑
三徑歸來亦未荒
莫道空山秋色淡
新花一朵御袍黃

題雙陸士女

手轉梟盧為破顏
玉人何意整雲鬟
也應暗卜關山客
歸馬須看一擲間

題虞魯瞻山水

御史新來水石工數峰依約米南宮試漆茅屋秋林下
著我江南鶴髮翁

題東坡戴笠圖

兩屐新泥弱笠歌滿邨風雨獨歸時玉堂天上神仙客
婦女兒童總未知

朱寔送桂花

廣寒宮裏杪欂櫨金粟初分第一枝滿室天香吹不斷
老夫清夜酒醒時

題竹間桃花

萬琅玕裏一枝春
向客無言又似顰
彷彿武陵溪上路
放舟何處覓秦人

詩餘

漢宮春

細雨廉纖乍魚翻綠
皺鶯哺紅甜那堪
歸期總負別恨
還添榴花一點
記重重繡戶朱簾
人乍起玉釵半脫
遠山輕拂
雙尖不道而今
落魄怪朱顏頓改
換得霜鬢

無心新聲樂府舊體香奩傷令弔古但時時強擬江淹
渾得似春風燕子飛來也傍茅簷

瑞鷓鴣

風林初夜月輪高鳥飛不盡楚天遙一曲清江恰似瀟
湘路何處人家傍小橋十年空負歸來約已無舊杏
新桃謾思田父前時同在雞豚社日相招酒壓梨花醉
一瓢

應天長

吳仲圭秋
江獨釣圖

澄江日落渺一葉歸航渡口初泊垂釣何人不管中流
風惡西山青似削曠千里楚鄉蕭索問甚處更有桃源
看花如昨 往事總成錯羨范蠡風流故跡依約微利
虛名何啻蠅頭蝸角官袍無意著但消得綠蓑青蒺藺
堪斫明月當天酒醒還酌

玉蝴蝶

極目江南千里故人何處一段傷心漠漠行雲纔霽又
作輕陰訴西風寒蛩近戶背落日歸鳥投林正秋深殘

山剩水應怕登臨難禁 多情總老流黃不寄尺素空
沉綠瑣紅迷豈知零落到而今似丁香離腸暗結點白
雪衰鬢先侵思惛惛一聲羌管幾處鄰砧

玲瓏四犯 春情

江草江花總付與春風何處池苑露染煙裁依舊翠深
紅淺天氣漸近清明但覺比舊時都倦問此時脉脉誰
念惟有乳鶯巢燕 銀箏低按斜飛雁尚依稀小窗深
院珠簾日午重重下空鎖秋娘怨憔悴一束楚腰也定

怕蕭郎再見想夜深暗卜歸候把燈花翦

鎖窗寒

雁別衡陽春光已到去年時節河堤弱柳拂水萬條堪
結更無情東風幾番海棠一夜西園發但草深曲徑看
花人少亂飛蝴蝶最是傷心切總過了花朝漢宮傳
蠟方回未老白髮那教成雪憶當時歌扇舞裙小樓十
二空夜月待重尋舊侶高陽喚酒攜桃葉

八六子

秋日
海棠

滿空山亂飄黃葉花仙特地衝寒恨薄命蕭娘嫁晚捧
心西子妝成恍然夢閒 清明時節曾看院落早鶯猶
困樓臺乳燕初還悵過了韶華一枝偷綻拒霜爭豔斷
霞分彩空贏得人自先驚老去天應不放春閒倚闌干
春風別愁幾番

南浦

賦水光山色舟

一葉小如鳬趁幾番樵風日日來往何處最堪看吳門
外都是白波青嶂斜陽半斂采菱尚有蓮娃唱謾載得

前邨月歸來人家三兩 何須萬斛黃龍駕灩預嬰塘
接天風浪空為利名牽誰能似鴟夷散髮湖上秋行更
好鏡中新綠東西向雪寒夜靜定多在蕭蕭蘆花深放

漁家傲

早春

弱柳緘黃梅傳粉燒燈已過花朝近塞上歸鴻猶有信
飛成陣王孫一去渾無准 院落沉沉人又困腰肢頓
覺羅衣褪兩點青山從淡盡君休問青山更有新來恨

西江月

元夕
二闋

夜月將圓寶鏡春冰已碎青瑤千門燈火近元宵一向
薄寒猶峭海上雙魚不至雲間彩鳳難招小樓十二
更蕭蕭白髮空思年少

十日催花雨過九衢著柳風輕城中何處不觀燈菡萏
夜開千柄酌酒何辭潏灩吹簫更引娉婷如今海角
歎飄零落月半窗清影

風入松

一鈎初月小如眉又是去年時東風著意催花柳元朝

過休放春遲野老田夫共樂青山白水相宜 男兒了
事却成癡七十更何為也知七十從來少但從容把酒
論詩獨樂園中司馬雲臺觀裏希夸

鳳棲梧

一日思歸歸便許何

闕

忘却歸來路春已無多風

又雨桃花柳絮渾無數 第四橋邊君住否唯有當時
月照傷心處水滿洞庭飛白鷺吹簫夜過西山去

風入松


踏槐猶記伴兒童今日總成翁十年不到西湖路輕孤
負秋月春風回首桃花水遠傷心燕子樓空 貂條冶
葉自西東何處托流紅繁華夢斷愁多少都分付鸚鵡
杯中莫問今來古往倚樓閒送飛鴻

水龍吟

春思

楚天歸雁千行一字不寄相思苦匆匆過了踏青時節
更愁風雨燕子黃昏海棠春曉幾番淒楚問誰能為寫
重重別恨算除有江淹賦 尚記銀屏翠箔把琵琶夜

調新譜芳年易度沈腰寬盡白頭如許弱水三山武林
一曲重尋何處奈無情杜宇年年此日到淮南路



清江詩集卷十